




*Minggu, 09 April 2023*  
**Ogen: Matius 28:7-10**



**Leben IA Ku Galilea, Ola Mbiar**



**O**la mbiar! Enda me belas-belas kalak si mereken ketetapan ukur man temanna si sangana i bas kebiaren ras kearun ate. Melala si erbahansa kita mbiar; erkiteken pinakit si mekelek, itadingken orang tua, erkiteken sangana ujian, mbiar erkiteken perdalanen si ndaul si lenga pernah idahina ras sidebanna. Mbiar e erbahansa la teneng, lanai beluh rukur mehuli. Bage me situasi si man alanken Maria Magdalena ras teman-temanna tupung sura-surana naruhkan bunga ku kuburen Tuhan Jesus. Sanga ia bas perdalanen reh linur si mesangat, nggulingken batu penutup kubur Jesus janah keke Jesus i bas si mate nari. La terukuri alu logika tapi e me terjadi. Maria Magdalena mbiar, akapna Jesus enggo tangko kalak. Mbiar ia lanai lit guruna si man ulih-ulihenna. Mbiar e enggo engkuasai perukureнна, e maka tangis nari ngenca ia.

Ijumpai malaikat Maria Magdalena, ipegegehina alu mereken kata-kata, Jesus lanai i jenda, IA enggo keke, janah genduari leben IA lawes ku Galilea, i jah idahndu me IA. Lit i je makna maka Jesus labo bene, Jesus labo mate rasa lalap, Jesus nggeluh dengen nimai kalak si reh ndahi IA. Lit kepastin i bas Jesus, si reh ndahi IA ku Galilea pasti jumpa. E maka nina Malaikat, kataken man kerina ajar-ajar lako berkat ku Galilea, i jah ia itimai Jesus.

Kenca si e ijumpai Jesus Maria Magdalena lako mpetetap ukurna sabap enggo pe ngerana malaikat e lalap denga lenga tetap ukurna, aru atena perbahan lanai iidahna Jesus bas kubur. Ola kam mbiar! Enda kata-kata pergegeh si ibereken Jesus. ituduhkanNa diriNa man Maria, gelah enggo tek kal Maria e Jesus enggo keke, Jesus nggeluh, janah rasa lalap IA nggeluh. E maka isuruhNa Maria njumpai ajar-ajar lako berkat ku Galilea, I jah Jesus nimai ia.

Nimai beda ras nadingken. Nimai e lit si man arapen ras pasti. Ajar-ajar pasti jumpa ras Jesus adi reh ia ku Galilea. Adi nadingken, lenga tentu jumpa, erkiteken la jelas ku ja perlawesna.